



Aatsitassanut inatsimmiittup § 45c -p allannguutissaatut inatsimmik siunnersuummik kingusinnerpaamik UPA 2017 sioqqullugu saqqummeeqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Taamaalilluni aligoqqiit (diamant), aligut aappalaartut (rubin), safir, smaragd, chrysoberyl, kiisalu opal-it §§ 45-miit 45a-mut malittarisassat malillugit katersorneqarsinnaalersillugit.

(Inatsisartunut ilaasortaq Peter Olsen, Inuit Ataqtigiit)

Inatsisartunut ilaasortaq Peter Olsen, Inuit Ataqtigiinneersup siunnersuutaa, tassa Aatsitassanut inatsimmiittup § 45c -p allannguutissaatut inatsimmik siunnersuummik kingusinnerpaamik UPA 2017 sioqqullugu saqqummeeqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Taamaalilluni aligoqqiit (diamant), aligut aappalaartut (rubin), safir, smaragd, chrysoberyl, kiisalu opal-it §§ 45-miit 45a-mut malittarisassat malillugit katersorneqarsinnaalernissaat pillugu siunnersuut Partii Naleqqamiit imannaq oqaaseqarfigissuarput.

Siunnersuut soqutiginarloq aamma Partii Naleraq sinnerlugu siorna siunnersuutigisimasannut tunngavimmit assingusoq , qujanaqaaq Inatsisartunut ilaasorta Peter Olsen-ip saqqummiummagu.

Aamma upernaq manna immikkoortoq 66 aamma ujaqqanut pinneraasiassanut attuumassuteqartoq aamma saqqummiupparput, taamaattumik siunnersuut una tamakkiisumik aamma taperserparput.

Tassami ujaqqat qulaani taaneqartut siullerpaatut maani najungaqavissunut tamakkiinerusumik iluaqutissatut atorluangassatullu inatsisitigut qulakkeerunneqarnissaat pisariaqarluinnarmat.

Pisuussutit tamakku nunatsinniik annissuutiinnarnagit, nunap inuiinut tamakkiinerusumik iluaqutissanngortinneqartariaqarput.

Aamma ujaqqanik silisinermit ilinniartitsinerit pikkorissaanerillu ilinniartitaanermut pilersaarummi ilaatinneqartariaqarluinnartut isumaqarpugut.

Isumaqarpugut aatsitassarsiornermit ilinniarfiup ataani, ujarassiornermit ilinniarfimmik pilersitsisoqarnissaa piunasaqaataasariaqartoq.

Tassami Ujaqqat pineqartut silineqareerlutik nalitunerpaaffissaat angoreerlugu avammut tuniniagassannngortinneqarsinnaasariaqarput.

Tassami aatsitassat pillugit ingerlatallu tamatumunnga pingaarutillit pillugit inatsisartut inatsisaat manna atuuttoq innuttaasunut maani najungaqavissunut sakkortuumik killiliisoq, ilami allaat nunaqavissut rubininik allanillu ujaqqanik erlinnartunik katersisinnaanerat iluanaaruteqarniarsinnaanerallu killilerujussuuvoq.

Naammanginnangilaq nunami tamanut ammasumik tv-ikkut ujaqqanik erlinnartunik nunami allamiuit paaasut isiginnaarlugit, allaat ilaatigut angallammik Nuummut tikilernerminni oqaluttut iluaralugu unnukkut taarsereernerani tikittussannngornertik, tassagoq qanoq ujaqqanik erlinnartunik katersaqartiginertik takuneqassannngimmat ?

Ataguli kalaallit pisuussutitsinnik uumaatsunik iluanaaruteqarnerulernissaat tamakkiisumik periarfissinniartigu. Ajornaqaaq suna tamaat avammut tunniussuutiinnarsinnaanngilarput.

Taamaattumik ilaatigut kaataq qussaatarlu atorlugit kalaallit ujarassiorsinnaanerata aamma ujaqqanik pinnersaasiassanik, ujaqqanilluunniit erlinnartunik tuniniaasinnaanerat ammaattariaqartoq Partii Naleqqamiit piunasaqaatingaarput.

Taamaammata kalaallit ujarassiornermi, ujaqqanik pinnersaasiassanik, erlinnartunillu katersinermi paaasinnaanermilu salliutinneqarnissaat assorujussuaq pingaartipparput, taakkuuppummi nunatsinni aningaasaqarnikkut kivitseqataanerusussat, pisuussutitsinnillu naleqarnerulersitsisussat.

Tassa kalaaleqatitta iluanaarsinnaanermut killilersuiffigineqarnerat tamaanga killilertariaqarparput.

Isumaqarpugut nalunaartussaataaneq nakkutilliinerillu pillugit ujarassiornermik soqutigisallit qanimut suleqatigalugit aqqissuussinerit pitsaasut aaliangersaavigineqarsinnaasut, tassami

ujarassiornermik soqutigisallit peqatigiiffeqarput, tamakku Nalakkersuisunit qanimut suleqatigineqarnissaat inassutingaarput.

Illua-tungaaticullu tikeraat nunatta avataaneersut nakkutigineqarnerat sukateriffigineqartariaqartoq aamma isumaqarpugut, tassami tusaamavarput, ilaatigut angallatit nunatta avataaneersut; soorlu assersuutigalugu tingerlaataannallit aasakkut sinerissami nakkutigineqaratik sumi tamaani angallattut inatsisitigut pimaffigineqarnerusariaqarput aamma nakkutigineqarnerusariaqartut piumasaraarput.

Taama naakkaluarmik oqaaseqarluta siunnersuut tamakkiisumik taperserlugu suliap aappassanneerpeqannginnerani ataatsimiititaliami susassaqartumi suliarilluarneqarnissaa inassutingaarput.